

TRANSKRIPT
KONSTITUIRAJUĆE SJEDNICE DOMA NARODA
PARLAMENTARNE SKUPŠTINE BOSNE I HERCEGOVINE
održane 14.03.2007.godine, sa početkom u 11:00 sati

PREDSJEDAVAJUĆI
STAROG SAZIVA
GORAN MILOJEVIĆ

Poštovani delegati, vaše ekscelencije, uvaženi gosti, predstavnici sredstava javnog informisanja, na osnovu člana 2., tačka 2. Poslovnika Doma naroda Parlamentarne skupštine Bosne i Hercegovine, Kolegijum iz prethodnog saziva saziva prvu, a u ovom slučaju konstitutivnu sjednicu Doma naroda Parlamentarne skupštine Bosne i Hercegovine.

Ja molim gospodina Mikića da, ispred Centralne izborne komisije, uzme riječ i uruči certifikate novoizabranim delegatima.

GOSPODIN MIKIĆ

Zahvaljujem, predsjedniče. Poštovane dame i gospodo, imam čast da, u ime Centralne izborne komisije, uručim novoizabranim, odnosno izabranim izaslanicima u Dom naroda Parlamentarne skupštine Bosne i Hercegovine, uvjerenja ili certifikate.

Nikakav govor nije potreban s moje strane, osim iskrene čestitke i želje da što uspješnije odradite svoj mandat. Ja bih vas zamolio da, nakon što primite uvjerenje ili certifikat, da dođete ovdje do govornice, ja ću vam uručiti, a kad se vratite na vaše mjesto, da potpišete izjavu o prihvatanju ili neprihvatanju mandata jer od tog trenutka vaš mandat, zapravo, i započinje.

Ista tako, imate jednu informaciju uz, u ovoj fascikli, izvode iz Zakona o sukobu interesa, pa nije na odmet, u svakom slučaju, da pročitate. Zahvaljujem vam puno. I još jedanput vam čestitam svima na izboru.

NAIDA RIDŽAL

Gospođa Alma Čolo,
Gospodin Adem Ibrahimpašić,
Gospodin Hilmo Neimarlija,
Gospodin Hazim Rančić,
Gospodin Sulejman Tihić,
Gospodin Ilija Filipović,
Gospodin Ivo Miro Jović,
Gospodin Božo Rajić,
Gospodin Rudo Vidović,

Gospodin Branko Zrno,
Gospodin Mladen Ivanić,
Gospodin Zoran Koprivica,
Gospodin Drago Ljubičić,
Gospođa Dušanka Majkić i
Gospodin Slobodan Šaraba

GOSPODIN MIKIĆ

Predsjedniče, zahvaljujem se još jedanput i koristim prigodu da čestitam svim izabranim izaslanicima u Dom naroda. Hvala lijepa.

GORAN MILOJEVIĆ

Zahvaljujem gospodinu Mikiću. Ja isto duboko vjerujem da ste svi potpisali ovaj certifikat i, evo, koristim priliku da vam čestitam i iskreno zaželim sretan i uspješan rad.

Članom 2., tačka 3. Poslovnika Doma naroda Parlamentarne skupštine Bosne i Hercegovine, predviđeno je da prvom sjednicom, dok se ne izaberu predsjedavajući, predsjedava najstariji izabrani delegat kao privremeni predsjedavajući.

Molim gospodina Adema Ibrahimpašića da preuzme mjesto privremenog predsjedavajućeg.

PRIVREMNI PREDSJEDAVAJUĆI ADEM IBRAHIMPAŠIĆ

Dame i gospodo, poštovani delegati, poštovani predsjedavajući, članovi Predsjedništva BiH, predsjedavajući i članovi Vijeća ministara BiH, poštovani Visoki predstavnice, gospodine Švarc Šiling, predstavnici ambasada u BiH i međunarodnih organizacija, poštovani gosti i predstavnici sredstava javnog informisanja, sve vas srdačno pozdravljam i otvaram konstituirajuću sjednicu Doma naroda Parlamentarne skupštine Bosne i Hercegovine.

/INTONIRANJE HIMNE/

Centralna izborna komisija BiH je u skladu sa članom 2.9., stav 1., tačka 9., a u vezi sa članom 9.12. Izbornog zakona BiH potvrdila rezultate posebnih izbora Odlukom broj 01-07-1-2664/06 od 28.11.2006.godine, na osnovu dostavljenih rezultata glasanja provedenog na Narodnoj skupštini Republike Srpske i Odlukom broj 0107-1-746/07 od 27.02.2007.godine, te na osnovu dostavljenih rezultata glasanja provedenog u Domu naroda Parlamenta Federacije BiH i dodijelila mandate za Dom naroda Parlamentarne skupštine BiH kako slijedi.

Delegati iz reda bošnjačkog naroda;

- Alma Čolo,

- Adem Ibrahimpašić,
- Hilmo Neimarlija,
- Hazim Rančić,
- Sulejman Tihic.

Delegati iz reda hrvatskog naroda;

- Ilija Filipović,
- Ivo Miro Jović,
- Božo Rajić,
- Rudo Vidović,
- Branko Zrno.

Delegati iz reda srpskog naroda;

- Mladen Ivanić,
- Zoran Koprivica,
- Drago Lubičić,
- Dušanka Majkić i
- Slobodan Šaraba.

Na sjednici je prisutno, dakle, 15 delegata. Od toga 5 iz reda bošnjačkog naroda, 5 iz reda hrvatskog naroda i 5 iz reda srpskog naroda.

U skladu sa članom 3. Poslovnika Doma naroda Parlamentarne skupštine, delegati preuzimaju dužnost zajedničkim davanjem svečane izjave.

Molim vas da nakon davanja svečane izjave i potpišemo svečanu izjavu.

/DAVANJE SVEČANE IZJAVE/

ADEM IBRAHIMPAŠIĆ

Obavezujem se,

DELEGATI

obavezujem se

ADEM IBRAHIMPAŠIĆ

da ću savjesno obavljati dužnosti koje su mi povjerene,

DELEGATI

da ću savjesno obavljati dužnosti koje su mi povjerene,

ADEM IBRAHIMPAŠIĆ

poštovati Ustav BiH

DELEGATI

poštovati Ustav BiH

ADEM IBRAHIMPAŠIĆ

u potpunosti provoditi Opći okvirni sporazum za mir u BiH

DELEGATI

u potpunosti provoditi Opći okvirni sporazum za mir u BiH

ADEM IBRAHIMPAŠIĆ

Štititi i zauzimati se za ljudska prava i osnovne slobode

DELEGATI

štititi i zauzimati se za ljudska prava i osnovne slobode

ADEM IBRAHIMPAŠIĆ

te štititi interese i ravnopravnost svih naroda i građana.

DELEGATI

te štititi interese i ravnopravnost svih naroda i građana.

ADEM IBRAHIMPAŠIĆ

Hvala lijepa.

/APLAUZ/

Dame i gospodo, za konstituirajuću sjednicu predlažem sljedeći dnevni red,

1. Osnivanje klubova naroda,
2. Izbor predsjedavajućeg, prvog i drugog zamjenika predsjedavajućeg Doma naroda.

Otvaram raspravu o prijedlogu ovog dnevnog reda.

Je li se neko javlja? Niko.

Zaključujem raspravu.

Ko je za ovakav dnevni red?

Molim vas, glasajte po papirima, tehnologija nešto nije uredu.

Hvala. Konstatujem da je dnevni red usvojen jednoglasno.

Prva tačka,

Ad.1. Osnivanje klubova naroda

ADEM IBRAHIMPAŠIĆ

Članom 4. Poslovnika Doma naroda je predviđeno da se poslije davanja svečane izjave osnivaju tri kluba delegata konstituirajućih naroda.

Da li ima potrebe za pauzom kako bi se klubovi naroda sastali i izabrali predsjedavajućeg i zamjenika predsjedavajućeg? Ima li potrebe?

Dajem pauzu 15 minuta. Nađemo se tu u 11.20.

/PAUZA/

Nastavljamo s radom. Molim predstavnike klubova da obavijeste Dom o osnivanju klubova naroda i da nas upoznaju ko su predsjedavajući klubova, a ko zamjenici predsjedavajućih klubova.

Molim predstavnika Kluba bošnjačkog naroda da obavijesti Dom ko je izabran za predsjedavajućeg i zamjenika predsjedavajućeg Kluba.

HILMO NEIMARLIJA

Gospodine predsjedavajući, kolege delegati, uvaženi gosti, drago mi je što mogu da vas pozdravim (odmaknut od mikrofona, skroz slabo se čuje) ... rad i ujedno vas obavijestiti da je Klub Bošnjaka izabrao za predsjedavajućeg Kluba kolegu Hazima Rančića, a za zamjenika predsjedavajućeg kolegu Adema Ibrahimpašića. Hvala lijepa.

ADEM IBRAHIMPAŠIĆ

Zahvaljujem i konstatujem da je Klub Bošnjaka osnovan i da je predsjednik Kluba Hazim Rančić, a zamjenik predsjednika Adem Ibrahimpašić. Hvala lijepa.

Molim predstavnika Kluba hrvatskog naroda da obavijesti Dom ko je izabran za predsjedavajućeg i zamjenika predsjedavajućeg Kluba. Izvolite.

RUDO VIDOVIĆ

Poštovani gospodine predsjedatelju, uvažene kolegice i kolege poslanici, poštovani gosti, Klub izaslanika hrvatskog naroda je iskoristio stanku i usuglasio sljedeća stajališta.

Pod jedan, za predstavnika Kluba hrvatskog naroda izabran je Rudo Vidović, a za zamjenika predsjednika Kluba gospodin Branko Zrno. Hvala.

ADEM IBRAHIMPAŠIĆ

Hvala. Konstatujem da je Klub Hrvata osnovan i da je za predsjednika Kluba izabran gospodin Rudo Vidović, a za zamjenika predsjednika gospodin Branko Zrno.

Molim predsjednika Kluba srpskog naroda da obavijesti Dom ko je izabran za predsjedavajućeg i zamjenika predsjedavajućeg Kluba, izvolite.

DUŠANKA MAJKIĆ

Poštovani predsjedavajući, poštovane kolegice i kolege delegati, u ime srpskog naroda hoću da vas obavijestim da je za predsjedavajućeg Kluba izabrana Dušanka Majkić, a za zamjenika Drago Ljubičić. Hvala.

ADEM IBRAHIMPAŠIĆ

Hvala lijepa. Konstatujem da je Klub Srba osnovan i da je za predsjednika Kluba izabrana gospođa Dušanka Majkić, a za zamjenika Drago Ljubičić. Hvala lijepa.

S ovim smo završili ovu prvu tačku.
Prelazimo na drugu tačku,

Ad.2. Izbor predsjedavajućeg i zamjenika predsjedavajućeg Doma naroda

ADEM IBRAHIMPAŠIĆ

Moram vas samo upoznati sa dijelom Poslovnika. Dakle, članom 7. Poslovnika Doma naroda je predviđeno sljedeće:

Član 7.1., nakon što su osnovani klubovi naroda, Dom iz redova svojih članova bira jednog Hrvata, jednog Bošnjaka i jednog Srbina koji će vršiti dužnosti predsjedavajućeg, prvog zamjenika predsjedavajućeg i drugog zamjenika predsjedavajućeg Doma naroda.

Predsjedavajući ne može biti izabran iz istog konstitutivnog naroda kao predsjedavajući Predstavničkog doma.

Član 7.2.,svaki klub naroda i svaki delegat ima pravo predlagati kandidate za ove dužnosti. Ako za jedno mjesto ima više kandidata, prvo se glasa za kandidata kojeg je predložio klub naroda, a nakon što se utvrdi lista kandidata za svako mjesto, pristupa se glasanju.

Član 7.3., ako od više kandidata za jedno mjesto nijedan kandidat nije dobio potrebnu većinu, ili su dobili jednak broj glasova, glasanje se ponavlja za dva kandidata koji su dobili najviše, odnosno, jednak broj glasova.

Član 7.4. Odluka o izboru donosi se na način utvrđen za odlučivanje u Domu, s tim što će u slučaju usuglašavanja, usuglašavanje obaviti predsjednici klubova naroda. A, ako usuglašavanje ne uspije, glasanje se ponavlja.

Član 7.5., ako nijedan kandidat nije dobio potrebnu većinu, glasanje se u cjelini ponavlja.

Imajući u vidu član 7.2., klubovi naroda, kao i delegati, imaju pravo da predlože kandidata za predsjedavajućeg, odnosno zamjenike predsjedavajućih Doma naroda.

Prvo treba da se predloži kandidat za predsjedavajućeg, a u ovom slučaju mjesto predsjedavajućeg pripada kandidatu iz reda hrvatskog naroda. Zatim se predlaže prvi zamjenik predsjedavajućeg iz reda bošnjačkog naroda, a potom drugi zamjenik predsjedavajućeg iz reda srpskog naroda. Ovaj redosljed je u skladu sa članom 7.1. kako u jednom momentu predsjedavajući oba doma ne bi bili iz istog konstitutivnog naroda.

Želim da vam napomenem da je članom 22.1. Poslovnika Doma naroda predviđeno sljedeće: mjesto predsjedavajućeg automatski se rotira bez glasanja, svakih osam mjeseci počevši od dana izbora predsjedavajućeg.

Molim predsjedavajućeg Kluba hrvatskog naroda da predloži kandidata za predsjedavajućeg.

RUDO VIDOVIĆ

Hvala lijepa. Klub izaslanika iz reda hrvatskog naroda jednoglasno je odlučio da se za predsjedatelja Doma naroda Parlamentarne skupštine BiH predloži i izabere izaslanik Ilija Filipović.

Gospodin Ilija Filipović, diplomirani pravnik, rođen je 22. srpnja 1949. godine u Strošinjcima, Općina Županja. Završio je Pedagošku akademiju, jezik i književnost i studij prava na Pravnom fakultetu u Mostaru, a pravosudni ispit položio je u Sarajevu.

Najveći dio radnog vijeka proveo je na poslovima informiranja i stambeno komunalne djelatnosti te u oblasti kulturnog, javnog, gospodarskog i političkog djelovanja. Sudionik je brojnih stručnih i naučnih seminara kao i političkog dogovora čelnih političkih stranaka i usaglašenog prvog paketa o mogućoj prvoj fazi izmjena Dejtonskog Ustava BiH.

U proteklom sazivu Parlamentarne skupštine BiH, četiri godine predsjedavao je Ustavnopravnim povjerenstvom u Domu naroda. Suautor Zbirke propisa iz oblasti ustavnog prava i državne uprave i Zbirke obrazaca iz upravnog prava. Oženjen i otac dvoje djece. Hvala.

ADEM IBRAHIMPAŠIĆ

Hvala lijepa. Izlišno je da pitam ima li neko od delegata prijedlog jer ste bili jednoglasni, ali moram da pitam.

Ima li neko od delegata još neki prijedlog?
Nema.

Ko je za ovaj prijedlog Kluba hrvatskog naroda neka digne ruku?
Hvala lijepa.
Ima li neko protiv?
Suzdržan? 1
Dakle, 14 za, 1 suzdržan.
Za predsjedavajućeg Doma naroda izabran je gospodin Ilija Filipović.

Molim predsjedavajućeg Kluba bošnjačkog naroda da predloži kandidata za prvog zamjenika predsjedavajućeg.

HAZIM RANČIĆ

Predsjedavajući, dame i gospodo delegati, članovi Vijeća ministara, uvaženi gosti, dopustite mi da čestitam svim izabranim delegatima, zaželim uspješan rad, dug život i dobro zdravlje. Takođe, čestitam izabranim članovima Vijeća ministara. Želim im uspješan rad i nadam se da ćemo, na zadovoljstvo svih, dobro sarađivati sa Vijećem ministara.

U skladu sa članom 7. Poslovnika Klub delegata bošnjačkog naroda jednoglasno za predsjedavajućeg, odnosno zamjenika predsjedavajućeg iz reda bošnjačkog naroda predlaže delegata Sulejmana Tihića.

Kratko ću samo, dozvolite mi da kažem. Gospodin Tihić je rođen 26.11.1951.godine u Bosanskom Šamcu. Diplomirani je pravnik. Dugogodišnji sudija, advokat i tužilac. Bio je poslanik u Skupštini, dakle, u Narodnoj skupštini RS-a, bio je član Predsjedništva BiH. Trenutno je član ovog Doma i predsjednik je Stranke demokratske akcije. Hvala lijepo.

ADEM IBRAHIMPAŠIĆ

Budući da je i ovo bilo jednoglasno, ja ću, ipak, upitati ima li neki delegat svoj prijedlog? Nema.

Molim vas, ko je za ovaj prijedlog Kluba bošnjačkog naroda, neka digne papir? Hvala.

Ima li ko protiv?

Suzdržan?

Sa 14 glasova za, 1 uzdržanim, konstatujem da je za prvog dopredsjedavajućeg, prvog zamjenika predsjedavajućeg izabran gospodin Sulejman Tihić.

Molim predstavnike srpskog kluba ili Kluba srpskog naroda da predloži kandidata za drugog zamjenika predsjedavajućeg. Izvolite.

DUŠANKA MAJKIĆ

U skladu s članom 7. Poslovnika Doma naroda, Klub delegata srpskog naroda za zamjenika predsjedavajućeg iz reda srpskog naroda predlaže profesora doktora Mladena Ivanića.

Nadam se da nemam potrebe mnogo da govorim. Gospodin Ivanić je rođen '58.godine. Doktor je ekonomskih nauka i dolazi sa mjesta ministra u Savjetu ministara.

ADEM IBRAHIMPAŠIĆ

Hvala lijepa. Nema nekog drugog prijedloga od delegata? Nema.

Molim vas, ko je za ovaj prijedlog Kluba srpskog naroda da se za drugog zamjenika predsjedavajućeg izabere gospodin Ivanić? Hvala lijepa.

Ima li neko protiv? Nema.

Suzdržan? 1

Dakle, sa 14 glasova za, i 1 suzdržanim glasom, gospodin Ivanić je izabran za drugog predsjedavajućeg.

Čestitam izabranim delegatima i molim ih da zauzmu svoja mjesta. Pardon, jesam li dobro rekao? Jesam. Izvolite.

/APLAUZ/

ILIJA FILIPOVIĆ

Dakle, red je sad progovoriti koju riječ, prije okončanja konstituirajuće sjednice koja je, evo, na ovaj način završena, čime smo, praktično, okončali konstituiranje Parlamentarne skupštine BiH.

Želio bih se, dakle, u svoje osobno ime zahvaliti na podršci svima onima koji su u ovoj vrlo složenoj proceduri kandidiranja, predlaganja i izbora sudjelovali do današnjeg dana, kako bi se dobio Kolegij Doma naroda.

Želim vas zamoliti za nazočenje sjednici koja će se održati u petak, 16.03.2007. s početkom u 10.45 sati, u ovoj istoj dvorani, na kojoj će se obratiti gospodin Oli Ren.

Također bih vas zamolio, ukoliko se niste, dakle, to su neke tehničke stvari, fotografirali, da tu obvezu izvršite u knjižnici Parlamentarne skupštine. Za to su zaduženi ljudi iz Tajništva koji će pokazati gdje je to, ako netko od vas to ne zna.

U povodu, dakle, konstituiranja ovog drugog doma Parlamentarne skupštine, nisu predviđene neke govorancije. Ja vam i nisam za to, ali je raniji Kolegij, dakle, dosadašnji Kolegij kojem zahvaljujem na uspješnom vođenju ovoga Doma, gospodi Jukiću, Pamuku i Milojeviću, dakle, odlučio održati jednu malu govoranciju i pripremio je, skupa sa Tajništvom, jedan mali koktel na koji su svi ovdje nazočni pozvani.

Molio bih, također, kolege, gospodina Tihića i gospodina Ivanića da se nakon tog malog koktela održi sjednica Kolegija, jer konstituiran Parlament jeste Parlamentarna skupština, ali treba konstituirati i tijela ovoga doma i zajednička tijela oba doma. Hvala vam lijepa.

Izvolite.

DUŠANKA MAJKIĆ

Ja bih htjela jednu sugestiju, sad na kraju sjednice, prvo želim da vam čestitam, izabranim članovima Kolegija i želim da kažem jednu stvar koja mislim da bi mogla biti korisna, a isto je tehničke prirode.

Da bi Dom naroda mogao uspješno obavljati svoju funkciju koja mu je Ustavom data, neophodno je, pored konstitutivne sjednice, formirati i tri stalne i šest zajedničkih komisija sa Predstavničkim domom.

S obzirom da je veliki broj materijala pristigao i da je neophodno jako brzo raditi, ja sam slobodna da predložim da se prva redovna sjednica Doma naroda na kojoj bi se izabrale tri stalne i šest zajedničkih komisija održi u petak u 14.00 sati.

Mislim da bi to bilo veoma korisno, jer odmah poslije toga možemo zakazati prve sjednice i formirati svoje komisije i završiti s ovim dijelom koji je protokolaran, da bismo mogli uspješno raditi. Na kraju, Predstavnički dom čeka na nas.

ILIJA FILIPOVIĆ

Zahvaljujem se na ovako konstruktivnim prijedlozima. Mi smo u tom smislu već i razgovarali. Dakle, zbog toga sam i predložio da se nakon ove konstituirajuće sjednice održi sjednica Kolegija ovoga Doma, gdje je prva zadaća ustrojiti stalna tijela Doma naroda, a znamo da je sutra 5. sjednica Zastupničkog doma, da je već gomila materijala, dakle, prošla proceduralno Zastupnički dom i da nas, dakle, koji imamo jednak zakonodavni kapacitet u ovom domu, očekuje jedan vrlo, vrlo velik posao. Hvala vam na tim sugestijama. Kolegij će o tome brinuti.

Zaključujem rad konstituirajuće sjednice Doma naroda Parlamentarne skupštine BiH.

Sjednica završila sa radom u 12:50 sati.